

Službeni glasnik BiH, broj 29/18

Na osnovu člana 2.9 stav (1) tačka 2, a u vezi s članom 1.10 stav (3), 9.5, 9.6, 9.8 i 13.5 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14 i 31/16) i članom 18. Poslovnika Centralne izborne komisije Bosne i Hercegovine ("Službeni glasnik BiH", br. 50/07, 33/09, 24/13 i 32/14), Centralna izborna komisija Bosne i Hercegovine je, na 14. sjednici, održanoj 19.04.2018. godine, donijela

UPUTSTVO

O IZMJENAMA UPUTSTVA O DODJELI I PRESTANKU MANDATA

Član 1.

(Dodjela mandata i Uvjerenje o dodjeli - član 9.10 i 2.9 stav (1) tačka 10. Izbornog zakona BiH)

U Uputstvu o dodjeli i prestanku mandata ("Službeni glasnik BiH", broj 37/14) član 15. se mijenja i glasi:

"Član 15.

(Dodjela mandata i Uvjerenje o dodjeli - član 9.10 i 2.9 stav (1) tačka 10. Izbornog zakona BiH)

(1) Nakon što Centralna izborna komisija BiH donese odluku o utvrđivanju prestanka mandata izabranom članu organa vlasti i dodjeli mandata narednom kvalificiranom kandidatu, odluke se dostavljaju strankama u postupku.

(2) Kvalificirani kandidat će uz odluku dobiti i obrazac izjave, koji propisuje Centralna izborna komisija BiH, kojom prihvata ili odbija mandat, a koji će uredno popuniti i dostaviti Centralnoj izbornoj komisiji BiH u roku od sedam (7) dana od dana prijema odluke i Izjave. Ukoliko prihvati mandat, Centralna izborna komisija BiH će, po pravosnažnosti odluke i u skladu sa članom 9.10, 9.12h, 10.8, 10.17, 11.8 i 11.14, odnosno članom 13.6 Izbornog zakona BiH, izvršiti dodjelu mandata kvalificiranom kandidatu i izdati Uvjerenje o dodijeljenom mandatu, u skladu s članom 2.9 stav (1) tačka 10. Izbornog zakona BiH.

(3) Izabranom članu organa vlasti, kao i kandidatu kojem se dodjeljuje mandat, Centralna izborna komisija BiH će dostaviti i obrazac izjave o imovinskom stanju, koju su isti dužni popuniti i dostaviti Centralnoj izbornoj komisiji BiH u roku od 30 dana, u skladu sa članom 15.8 stav (1) i stav (2) Izbornog zakona BiH.

(4) Centralna izborna komisija BiH će, nakon što izvrši dodjelu mandata, kopiju Uvjerenja i pravosnažnu odluku o prestanku mandata izabranom članu organa vlasti i dodjeli mandata sljedećem kvalificiranom kandidatu dostaviti organu u kojem je kvalificirani kandidat dobio mandat."

Član 2.

U članu 16. riječi "potpisivanja izjave o prihvatanju mandata" zamjenjuju se riječima "**pravosnažnosti odluke kojom mu je dodijeljen mandat, ukoliko prethodno prihvati mandat**".

Član 3.

Ovo uputstvo stupa na snagu danom objave u "Službenom glasniku BiH", a objavit će se i u "Službenim novinama F BiH", "Službenom glasniku RS", "Službenom glasniku Brčko distrikta BiH" i na internet-stranici Centralne izborne komisije BiH www.izbori.ba.

Broj 05-1-02-2-438-1/18
19. aprila 2018. godine
Sarajevo

Predsjednica
Dr. **Irena Hadžiabdić**, s. r.